



CYNGOR GWYNEDD
Adroddiad i Gabinet Cyngor Gwynedd

Dyddiad y cyfarfod: 07 Gorffennaf 2026

Aelod Cabinet: Y Cynghorydd R. Medwyn Hughes
Aelod Cabinet Economi a Chymuned

Swyddog Cyswllt: Sioned E Williams,
Pennaeth Economi a Chymuned

Teitl yr Eitem: **CRONFA TWF LLEOL: CYNLLUNIAU 2026/27 GWYNEDD**

1. PENDERFYNIAD A GEISIR

- 1.1. Cytuno i ymrwymo'r £6,317,640 o'r arian ddarparwyd i Gyngor Gwynedd ei ddyrannu i brosiectau yn 2026/27, i'r 10 cynllun a restrir yn yr adroddiad.
- 1.2. Dirprwyo'r hawl i'r Pennaeth Economi a Chymuned, mewn ymgynghoriad â'r Pennaeth Gwasanaeth Cyfreithiol, Pennaeth Cyllid a'r Prif Weithredwr, i gadarnhau manylion y cynlluniau a'r cyfraniad ariannol, penderfynu ar ddarparu llythyr cynnig ac unrhyw ddogfennaeth arall ar gyfer cytuno ariannu'r prosiectau.

2. Y RHESWM DROS YR ANGEN AM BENDERFYNIAD

- 2.1. Adroddwyd ar ddyfodiad y Gronfa Twf Lleol (Local Growth Fund - LGF) i Cabinet [10 Mawrth](#).
- 2.2. Mae blwyddyn gyntaf y Gronfa (2026/27) bellach wedi cychwyn a chynnig o arian gan Lywodraeth Cymru i Gogledd Cymru wedi ei dderbyn.
- 2.3. Mae blaenoriaethau'r LGF yn wahanol i'r Gronfa Ffyniant Gyffredin (Shared Prosperity Fund - SPF) sydd wedi bod ar waith ers 2022; ond ystyrir 2026/27 yn flwyddyn bontio i drefniadau newydd yr LGF.
- 2.4. Yn unol â dymuniad Llywodraeth Cymru, bydd y trefniadau llywodraethu a gweinyddu sefydlwyd ar gyfer yr SPF yn parhau i gael eu defnyddio ar gyfer 2026/27.
- 2.5. Bydd cyfrifoldeb am yr LGF yn trosglwyddo i Gydbwyllgor Corfforedig Gogledd Cymru o 2027/28 ymlaen.
- 2.6. Mae £6,317,640 o gyllideb y gogledd ar gyfer 2026/27 ar gael i Cyngor Gwynedd ei ymrwymo i brosiectau. Mae 73% o'r arian yn gyfalaf ac

mae gofyn cynllunio ar y sail fod yr arian yn cael ei wario cyn 31 Mawrth 2027.

3. CYFLWYNIAD

Cefndir

- 3.1. Ers 2022 mae Gogledd Cymru wedi derbyn arian o'r Gronfa Ffyniant Gyffredin (SPF) gan Lywodraeth y DG. Roedd yr SPF yn cael ei weinyddu ar y cyd gan siroedd y gogledd (drwy law Cyngor Gwynedd) gyda dyraniad o arian i bob sir benderfynu ar ei ddefnydd.
- 3.2. Mae £32.15 miliwm wedi ei fuddsoddi gan Cyngor Gwynedd drwy law yr SPF. Mae'r arian wedi elwa unigolion, mentrau, sefydliadau lleol a chymunedau ym mhob cwr o Wynedd (mae enghreifftiau o gynlluniau sydd wedi derbyn cefnogaeth ar gael ar [wefan y Cyngor](#)). 2025/26 oedd blwyddyn olaf cyllid yr SPF.
- 3.3. Y Gronfa Twf Lleol (LGF) yw'r rhaglen newydd sydd wedi dod yn lle'r SPF. Bydd £547 miliwn yn dod i Gymru o'r LGF dros dair blynedd o 2026/27 i 2028/29.
- 3.4. Mae'r LGF yn parhau i fod yn rhaglen gan Lywodraeth y DG ond Llywodraeth Cymru fydd yn derbyn yr arian ac yn atebol am ei wariant. Bwriad Llywodraeth Cymru yw dethol rhan helaeth o'r arian i ranbarthau a'u dymuniad yw gwneud hyn drwy law y Cydbwyllgorau Corfforedig (Uchelgais Gogledd Cymru yw'r Cydbwyllgor Corfforedig sy'n berthnasol i Wynedd).
- 3.5. Mae cyllid i'r LGF yng Nghymru wedi ei gadarnhau hyd at 31 Mawrth 2029. Ar 23 Mawrth roedd cyhoeddiad bod Llywodraeth y DG a Llywodraeth Cymru wedi cytuno ar [gynllun buddsoddi tair blynedd](#) ar gyfer y Gronfa.
- 3.6. Mae Llywodraeth Cymru yn ystyried 2026/27 yn flwyddyn bontio i ganiatáu amser i'r Cydbwyllgorau Corfforedig baratoi a chynllunio, felly bydd trefniadau gweinyddu a llywodraethu'r SPF yn parhau i gael eu defnyddio eleni.
- 3.7. Cyngor Gwynedd fydd Awdurdod Lleol arweiniol yr LGF ar ran siroedd y gogledd yn 2026/27. Mae'r Cyngor wedi derbyn llythyr cynnig am arian 2026/27 Gogledd Cymru gan Lywodraeth Cymru. Arwyddwyd y cynnig ar 23 Ebrill.

Cyllideb 2026/27

- 3.8. Mae £33,781,826 o arian Cronfa Twf Lleol wedi ei ymrwymo i'r gogledd ar gyfer 2026/27. Bydd 70% o'r arian yn cael ei dderbyn ar ffurf cyfalaf.
- 3.9. Gan ddilyn yr egwyddor o barhau dull gweithredu'r SPF mae cytundeb ymhlith siroedd y gogledd i ganiatáu ardaloedd unigol i benderfynu ar ddefnydd yr arian ar sail dosbarthiad gofodol yr SPF. Mae 19.3% o ddyraniad Gogledd Cymru wedi ei neilltuo i Wynedd.
- 3.10. £6,524,379 yw'r cyfanswm sydd wedi ei ddyrannu i Wynedd. Yn unol â'r arfer sefydlwyd gan yr SPF mae 4% o'r arian (£260,975) wedi ei glustnodi ar gyfer rheoli a gweinyddu'r Gronfa; o brofiad nid oes angen y swm yma yn llawn, felly bwriedir cynllunio ar y sail fod £6,317,640 ar gael i'w ymrwymo i weithgaredd.
- 3.11. Rhaniad yr arian ar gael i gefnogi prosiectau yw:
- | | |
|---------|------------------|
| Cyfalaf | £4,567,378 (72%) |
| Refeniw | £1,750,262 (28%) |
- 3.12. Mae'r gyllideb yn doriad o 20% (£1.6 miliwm) o'r SPF yn 2025/26. Mae'r newid ym mhwyslais y cyllid i arian cyfalaf yn golygu y bydd £4.2 miliwn (70%) yn llai o arian refeniw ar gael yn 2026/27.

Blaenoriaethau'r Gronfa Twf Lleol

- 3.13. Er ei fod yn disodli'r SPF mae bwriad a blaenoriaethau'r LGF yn wahanol, gan adlewyrchu blaenoriaethau newydd Llywodraeth y DG a'r newid yng nghyfansoddiad yr arian (h.y. y symudiad o arian refeniw i arian cyfalaf yn bennaf).
- 3.14. Yr uchelgais yw *cefnogi twf cynhyrchiant a mynd i'r afael â'r problemau sy'n arwain at anghydraddoldebau economaidd ledled Cymru.*
- 3.15. Mae tair blaenoriaeth i'r Gronfa ac wyth o amcanion. Blaenoriaethau'r Gronfa yw:
- Busnesau mwy cynhyrchiol a chystadleuol
 - Cynyddu sgiliau a chefnogi pobl i mewn i waith
 - Gwella seilwaith rhanbarthol
- 3.16. Mae Atodiad B [Cynllun Buddsoddi'r Gronfa](#) yn rhestru amcanion yr LGF yng Nghymru ac yn cynnwys gwybodaeth am y gweithgareddau sydd dan sylw gan Lywodraeth Cymru o fewn eu blaenoriaethau.

4. RHESYMEG A CHYFIAWNHAD DROS ARGYMELL Y PENDERFYNIAD

- 4.1. Mae'r Gronfa Twf Lleol (LGF) yn wahanol i'r SPF; mae'r LGF yn blaenoriaethu datblygu'r economi a sicrhau twf gan bwysleisio gweithgaredd sydd o bwys rhanbarthol. Nid oes sylw i ddatblygu cymunedol o fewn y Gronfa ac mae'r sgôp ar gyfer gweithgaredd adfywio wedi lleihau.
- 4.2. Mae oblygiadau'r newid i wariant sy'n gyfalaf yn bennaf hefyd yn sylweddol, yn arbennig o ystyried fod yn rhaid cynllunio ar y sail fod gofyn cwblhau gwariant erbyn 31 Mawrth 2027.
- 4.3. Mae hefyd gofyn cynllunio gyda gwybodaeth anghyflawn ac o fewn amserlen fer. Diwedd mis Mawrth cadarnhawyd y gyllideb, dim ond dangosyddion drafft ar gyfer yr LGF yng Nghymru sydd ar gael ac mae canllawiau'r Gronfa eto i'w cyhoeddi.
- 4.4. Mae adeiladu portffolio o gynlluniau ar gyfer y Gronfa Twf Lleol yng Ngwynedd yn 2026/27 wedi ei fframio gan yr uchod a'r gofynion ymarferol o gyflawni'r amodau yn fwyaf arbennig.

Egwyddorion ac ystyriaethau

- 4.5. Mae'r uchod yn llywio dewisiadau'r Cyngor ar gyfer yr LGF. Yn ddelfrydol, yn unol â'n harfer, byddai trefn agored wedi ei gynnal i wahodd ceisiadau er mwyn rhoi cyfle i fentrau a sefydliadau lleol gyflwyno eu cynigion; ond nid oes amser digonol ac mae elfennau o'r wybodaeth fyddai'n ddisgwyliedig gan ymgeiswyr yn parhau i fod yn anhysbys.
- 4.6. Er hyn, mae ymdrech wedi bod i adnabod rhestr o fuddsoddiadau all fod yn gymwys ac yn briodol i dderbyn arian gan y Cyngor o'r LGF yn 2026/27, yn seiliedig ar:
 - Cynlluniau Adfywio Ardal Lleol y sir;
 - Mewnbwn rhanddeiliaid a phartneriaid i gynllun cyflawni arfaethedig [ein Strategaeth Economaidd](#);
 - adborth swyddogion sy'n gweithio gyda chymunedau a mentrau; a,
 - chynlluniau presennol all fod yn addas i'r LGF.

Anogwyd unrhyw un gydag awgrymiadau addas i gysylltu gyda Cyngor Gwynedd (wele [gwefan y Cyngor](#)).

- 4.7. Mae'n bwysig nodi mai un ymhlith ystod o rhaglenni ariannu ydi'r LGF ac mai nid dyma'r unig ffynhonnell o fuddsoddiad yn y sir. Mae gwariant sylweddol yng Ngwynedd ar y gweill neu ar waith drwy law Cais Twf Gogledd Cymru, y Gronfa Adfywio Lleol, y rhaglen Trawsnewid Trefi a'r rhaglen Balchder Bro sydd am elwa ardaloedd ledled y sir.

- 4.8. Bydd pob cynllun a gefnogir drwy law yr LGF angen dangos eu bwriad i gyfrannu'n gadarnhaol i ddyfodol y Gymraeg.
- 4.9. Bydd hefyd yn ofynnol i bob rhaglen wireddu'r egwyddorion isod (sefydlwyd yn gan y Cyngor ar gyfer yr SPF yn lle gyntaf):
- a) Fod ymdrech fwriadol i sicrhau fod yr arian a'r budd yn deillio ohono yn elwa cymunedau a thrigolion ym mhob rhan o Wynedd.
 - b) Fod ymdrech fwriadol i annog gweithgareddau (a sefydliadau) nad ydynt wedi derbyn arian yn flaenorol gael mynediad i gymorth.
- 4.10. Tu hwnt i'r uchod, yr ystyriaethau allweddol ar gyfer dod â phecyn o gynigion ynghyd i dderbyn arian o ddyraniad Cronfa Twf Lleol Gwynedd oedd:
1. yr angen i sicrhau fod pob rhan o Wynedd yn elwa;
 2. aliniad gyda blaenoriaethau'r Strategaeth Economaidd;
 3. perthnasedd i brosiectau Gwynedd Llewyrchus Cynllun y Cyngor;
 4. cyd-fynd gyda blaenoriaethau lleol y Cynlluniau Adfywio Ardal;
 5. ffit gyda blaenoriaethau ac amcanion y Gronfa Twf Lleol a Fframwaith Economaidd Rhanbarthol Gogledd Cymru;
 6. **ymarferoldeb gweithredu o fewn y cyfyngiadau amser yr LGF** (sef cynllunio ar y sail fod angen gwario cyn 31 Mawrth 2027).

Y cynigion dan sylw

- 4.11. Ar sail yr ystyriaethau uchod, mae 10 prosiect wedi eu lunio ar gyfer y Gronfa Twf Lleol yng Ngwynedd yn 2026/27. Mae nifer o'r prosiectau hyn yn cynnwys rhaglen o weithgareddau er mwyn sicrhau fod pob rhan o Wynedd yn gallu gweld budd o'r cynlluniau .
- 4.12. Yng ngoleuni'r amserlen gyfyngedig ar gyfer datblygu a chyflawni gweithgaredd wedi ei ariannu gan yr LGF, mae datblygiad yr elfennau unigol o fewn y rhaglenni yn parhau, a bydd cyfansoddiad y gweithgaredd yn esblygu wrth i wybodaeth bellach ddod i law.
- 4.13. Mae'r pecyn o weithgaredd dan sylw wedi ei drafod a derbyn mewnbwn gan bartneriaid y Cyngor drwy law y Grŵp Ymgynghorol sefydlwyd i berwyl yr SPF, sy'n cynnwys cynrychiolwyr o'r sectorau cyhoeddus, busnes a'r trydedd sector.
- 4.14. Mae'r rhaglenni wedi eu dethol ar sail themâu ein Strategaeth Economaidd; *mentergarwch, pobl a lle:*

MENTERGARWCH	amcangyfrif:	£1.27M	20%
--------------	--------------	--------	-----

M1: Rhaglen cymorth a chefnogaeth Menter Gwynedd £990k

Pecyn o gymorth ymarferol ac ariannol gan Gyngor Gwynedd a darparwyr cefnogaeth busnes eraill yn y sir (Prifysgol Bangor, Hwb Mentergarwch a Cwmpas) i helpu mentrau newydd wedi eu harwain can ferched neu bobl ifanc sefydlu, ac i gefnogi mentrau lleol i fabwysiadu technoleg, arloesi a lleihau eu costau.

M2: Canolfan arloesi, busnes a sgiliau Trawsfynydd £280k

Cwblhau'r cynllunio manwl fydd yn sicrhau buddsoddiad o £20 miliwn+ i adeiladu canolfan a pharc gwyddoniaeth yn Nhrawsfynydd er mwyn creu cyfleoedd gwaith yn yr ardal a pharatoi trigolion a mentrau lleol i wneud y gorau o'r cyfle.

POBL amcangyfrif: £1.56M 25%

P1: Rhaglen cymorth Gwaith Gwynedd £462k

Pecyn o gymorth gan Gyngor Gwynedd a darparwyr lleol megis Gisda a chymdeithasau tai'r sir i helpu pobl leol sydd ddim yn gweithio i gael yr help maent ei angen i sicrhau swydd, ac i hwyluso pobl mewn swyddi elfennol i wella eu sgiliau er mwyn cael mwy o gyflog.

P2: Rhaglen sgiliau gweithlu Gwynedd £600k

Pecyn o help gan Grŵp Llandrillo-Menai i a) cefnogi pobl ifanc bregus i drosglwyddo yn llwyddiannus i fyd gwaith a b) helpu mentrau lleol gael y sgiliau cywir er mwyn addasu i newidiadau yn yr economi ac i dyfu a chreu gwaith.

P3: Rhaglen sefydlu rhwydwaith Gwynedd yn ei gymuned £495k

Rhaglen i ddatblygu a threalu'r cysyniad o ddatblygu rhwydwaith o leoliadau i ddarparu cymorth cyflogadwyedd, datblygu sgiliau a chymorth i fentrau ledled Gwynedd wedi eu cydleoli gyda llyfrgelloedd y sir.

LLE amcangyfrif: £3.45M 55%

L11: Talebau Talent Nôl i Wynedd £100k

Adeiladu ar weithgaredd o fewn Cynllun y Cyngor i annog / gefnogi pobl ifanc i aros a dychwelyd i'r sir drwy gydweithio â Prifysgol Bangor i sicrhau cyfleoedd gwaith yn lleol i raddedigion.

L12: Cronfa effeithlonrwydd ynni asedau cymunedol £350k

Darparu cymorth ariannol drwy law Mantell Gwynedd i helpu gosod offer fydd yn lleihau costau ynni asedau cymunedol y sir a'u gwneud yn hwy hyfyw a chynaliadwy i'r dyfodol.

L13: Rhaglen Ganol Dinas Bangor £547k

Cwblhau'r cynllunio manwl a sicrhau pecyn asedau ar gyfer defnyddio hamdden, iechyd a lles yn arf ar gyfer adfywio canolfan masnachol dinas Bangor.

L14: Rhaglen isadeiledd tir ac eiddo i alluogi twf £1.06M

Rhaglen o fuddsoddiadau i wella a chynyddu'r ddarpariaeth o unedau gwaith yn y sir gan alluogi mentrau lleol i sefydlu a thyfu. Gweithgaredd yn cynnwys gwella'r amgylchedd gwaith i fusnesau, darparu unedau ychwanegol a pharatoi cynlluniau manwl ar gyfer targedu arian pellach i sefydlu mwy o unedau yn y dyfodol.

L15: Rhaglen asedau diwylliant i alluogi twf £1.39M

Rhaglen o fuddsoddiadau ar draws Gwynedd yn asedau diwylliant, hamdden a threftadaeth i hwyluso ac annog datblygiad yr economi lleol.

4.15. Cyfanswm yr ymrwymadau uchod yw £6.28 miliwn. Gellir gweld peth amrywiaeth yn y costau ac mae tua £42,000 yn weddill i'w ddyrannu wrth i fanylion terfynol y cynlluniau ddod i law.

4.16. Mae Atodiad 1 yn cynnwys amlinelliad pellach o'r cynlluniau unigol. Mae Atodiad 2 (sydd ar gael i Aelodau'r Cabinet yn unig) yn amlinellu cyllideb y prosiectau dan sylw ynghyd ac unrhyw cydariannu.

5. CAMAU NESAF AC AMSERLEN

5.1. Drwy law yr adroddiad yma bydd y Cabinet yn penderfynu ar gefnogi'r 10 prosiect sydd wedi eu rhestru uchod ac yn pennu'r dyraniad o arian LGF.

5.2. Ar sail cefnogaeth y Cabinet i'r portffolio o gynlluniau bydd manylion terfynol y prosiectau unigol yn cael eu datblygu a'u cadarnhau drwy ffurflen gais.

5.3. Bydd cwblhau'r ffurflen cais yn gofyn am fanylion gweithgaredd y cynlluniau, cadarnhad o'r costau, canlyniadau arfaethedig ac aliniad y gweithgaredd dan sylw i'r LFG a blaenoriaethau lleol, rhanbarthol a cenedlaethol. Bydd hefyd yn ofynnol paratoi asesiad effaith a manylu sut mae'r cynllun yn cyfarch gofynion Deddf Llesiant Cenedlaethau'r Dyfodol ac yn cyfrannu at lewyrch y Gymraeg.

5.4. Bydd y Pennaeth Economi a Chymuned, mewn ymgynghoriad â'r Pennaeth Gwasanaeth Cyfreithiol, Pennaeth Cyllid a'r Prif Weithredwr yn asesu'r ffurflenni ac yn cadarnhau manylion y cynlluniau a'r cyfraniad ariannol. Ar y sail yma bydd modd gofyn i gytundebau ariannol gael eu llunio a'u rhyddhau; gyda'r nod fod gweithgaredd ar waith cyn yr haf.

- 5.5. Dim ond ar gyfer blwyddyn gyntaf y Gronfa Twf Lleol (2026/27) mae'r cyllideb wedi ei gadarnhau a bydd cyfrifoldeb ar gyfer y Gronfa yn trosglwyddo i'r Cydbwyllgor Corfforedig (Uchelgais Gogledd Cymru) yn Ebrill 2027. Mae gofyn cynllunio ar y sail fod yr arian sydd yn cael ei ymrwymo drwy law'r adroddiad angen ei wario cyn 31 Mawrth 2027
- 5.6. Mae'r Cydbwyllgor yn derbyn cyllid gan Lywodraeth Cymru yn 2026/27 er mwyn cynllunio a pharatoi ar gyfer blwyddyn 2 a 3 y Gronfa. Bydd y gwaith yn cynnwys paratoi gweledigaeth a chynllun twf yn nodi'r bwriad ar gyfer buddsoddi'r £70.61 miliwm fydd ar gael i'r rhanbarth ar gyfer y cyfnod.
- 5.7. Er na fydd modd i'r Cydbwyllgor gadarnhau unrhyw ymrwymiadau ariannol i gynlluniau, dymunwn geisio derbyn eu cefnogaeth mewn egwyddor i gefnogi rhai cynlluniau yng Ngwynedd sydd yn flaenoriaeth ranbarthol mor fuan ac y bo modd, gyda chynlluniau Canolfan Arloesi, Busnes a Sgiliau Trawsfynydd (M2) a Chanol Dinas Bangor (LI3) yn flaenoriaeth yn y lle gyntaf.

6. SYLWADAU'R SWYDDOGION STATUDOL

6.1. Sylwadau'r Pennaeth Cyllid:

"Mae'r arian sydd yn cael ei gynnig i Wynedd dan y cynllun ar gyfer 2026/27 yn sylweddol is na'r hyn a dderbyniwyd yn ystod y cyfnod blaenorol, ac mae newid proffil yr ariannu gan roi mwy o bwyslais ar arian cyfalaf yn ychwanegu i'r her. Fel mae'r adroddiad yn ei wneud yn glir, mae'n rhaid gwario'r arian yn ystod y flwyddyn ariannol gyfredol ac mae hynny am fod yn hynod o heriol o ystyried yr amser cyfyngedig sydd wedi bod ar gael i adnabod prosiectau a chynllunio ar eu cyfer. Mae eisoes yn fis Mehefin, a thra'n cydnabod nad oedd modd defnyddio'r dull a ffafrir i adnabod prosiectau addas mae'r hyn sydd wedi ei gynnwys yn yr adroddiad yn cynnig datrysiad pragmatig ac rwyf yn cefnogi'r penderfyniad a geisir."

6.2. Sylwadau'r Swyddog Monitro:

"Fel y nodir yn yr adroddiad mae'r penderfyniad a geisir yn seiliedig ar sefyllfa drosiannol wrth i reoli'r gronfa yma gael ei drosglwyddo CBC y Gogledd, Gan fod yn amserlen yn hynod o fyr mae angen creu cyfundrefn all ateb i'r her yma. Mae'r dirprwyo a gynigir yn ymateb i hyn mewn ffordd briodol. Rwy'n fodlon gyda priodoldeb y penderfyniad a geisir."

Rhaglen cymorth a chefnogaeth Menter Gwynedd (M1)

MENTERGARWCH

1. Rhagolygon ariannu

Cronfa Twf Lleol	£	990k
Arian o ffynonellau eraill	£	130K

2. Partneriaeth arfaethedig

Cyngor Gwynedd (yn arwain), Prifysgol Bangor, Hwb Menter, Cwmpas

3. Gweithgaredd arfaethedig

- Cymorth / grant i ferched a phobl ifanc i gychwyn menter o fewn y sectorau penodol
- Cymorth / grant i fentrau gyda photensial twf i ddatgarboneiddio ac i fabwysiadu technoleg
- Cefnogi mentrau lleol i elwa o arbenigedd y Brifysgol
- Cefnogi mentrau sy'n dymuno trosi i berchnogaeth y gweithlu

4. Ardal cyflawni

Bydd y prosiect ar waith ledled Gwynedd.

5. Deilliannau tebygol

- Merched wedi eu sbarduno i gychwyn menter lleol
- Pobl ifanc lleol wedi eu cefnogi i gychwyn mentrau
- Mwy o fentrau o fewn sectorau fydd yn ychwanegu gwerth i'r economi lleol
- Mentrau lleol yn y sir o fewn sectorau sy'n tyfu wedi cael help
- Mwy o fentrau lleol yn defnyddio arbenigedd y Brifysgol
- Y Brifysgol wedi ei wreiddio mwy yn y cymuned fusnes lleol
- Mentrau lleol hir sefydlog yn parhau ac yn aros ym mherchnogaeth lleol

6. Amcangyfrif canlyniadau

- Mentrau lleol wedi derbyn cymorth 65

Canolfan arloesi, busnes a sgiliau Trawsfynydd (M2)

MENERGARWCH

1. Rhagolygon ariannu

Cronfa Twf Lleol £ 280k

Arian o ffynonellau eraill £ Dim

2. Partneriaeth arfaethedig

Cyngor Gwynedd (yn arwain), M-SParc, NRS / NDA, Llywodraeth Cymru, Uchelgais Gogledd Cymru, Awdurdod Parc Cenedlaethol Eryri

3. Gweithgaredd arfaethedig

- Paratoi Achos Busnes Llawn ar gyfer y Ganolfan
- Paratoi dyluniadau manwl y Ganolfan a sicrhau hawl cynllunio
- Paratoi mentrau lleol i fanteisio ar y cyfleoedd
- Paratoi pobl ifanc lleol i fanteisio ar y cyfleoedd

4. Ardal cyflawni

Bydd y prosiect ar waith yn Bro Ffestiniog

5. Deilliannau tebygol

- £20M+ yn ei le i adeiladu'r Ganolfan
- Dyluniadau wedi derbyn caniatâd cynllunio
- Dogfennau tendr ar gyfer penodi adeiladwyr wedi eu llunio
- Mentrau lleol yn barod i fanteisio
- Pobl ifanc lleol yn dymuno aros yn yr ardal i fanteisio ar y cyfleoedd

6. Amcangyfrif canlyniadau

- Pobl lleol wedi derbyn cefnogaeth 20
- Mentrau lleol wedi ymgysylltu 40

Rhaglen cymorth Gwaith Gwynedd (P1)

POBL

1. Rhagolygon ariannu

Cronfa Twf Lleol	£	462k
Arian o ffynonellau eraill	£	Dim

2. Partneriaeth arfaethedig

Cyngor Gwynedd (yn arwain), Gisda, Adra / cymdeithasau tai

3. Gweithgaredd arfaethedig

- Cymorth i gyfeirio unigolion economaidd anweithgar i'r rhaglenni cywir
- Help i unigolion mewn swyddi elfennol wella eu sgiliau a cael swydd well
- Cefnogi pobl ifanc gyda anghenion cymhleth i fod yn barod i gael help i sicrhau swydd
- Cefnogi unigolion gyda anableddau dysgu - sydd ddim yn cyrraedd trothwy cymorth prif lif - yn cael swydd
- Helpu tenantiaid cymdeithasau tai i gael mynediad i hyfforddiant / profiad gwaith

4. Ardal cyflawni

Bydd y prosiect ar waith ledled Gwynedd.

5. Deilliannau tebygol:

- Pobl lleol yn cael mynediad i'r cymorth cywir
- Mwy o bobl lleol yn llwyddo ar ôl derbyn cymorth
- Llai o bobl ifanc yn trosi'n anweithgar economaidd
- Pobl lleol yn cael help i gyflawni eu potensial ac yn llai tebygol o fod yn dioddef o dlodi mewn gwaith

6. Amcangyfrif canlyniadau:

- | | |
|---|-----|
| • Pobl yn cael help i sicrhau swydd | 120 |
| • Pobl wedi mynychu hyfforddiant achrededig | 115 |

Cynllun sgiliau gweithlu Gwynedd (P2)

POBL

1. Rhagolygon ariannu

Cronfa Twf Lleol £ 600k

Arian o ffynonellau eraill £ Dim

2. Partneriaeth arfaethedig

Grŵp Llandrillo Menai (yn arwain), cyflogwyr lleol

3. Gweithgaredd arfaethedig

- Help i sicrhau fod pobl ifanc bregus yn aros yn y Coleg ac yn cwblhau eu cyrsiau
- Help i sicrhau fod pobl ifanc bregus yn trosglwyddo'n llwyddiannus i hyfforddiant pellach neu swydd pan yn gorffen yn y coleg
- Hyfforddiant i weithwyr mentrau lleol i wella eu sgiliau
- Uwchraddio offer peirianyddol y Coleg yn Nolgellau

4. Ardal cyflawni

Bydd y prosiect ar waith ledled Gwynedd.

5. Deilliannau tebygol:

- Llai o bobl ifanc yn trosi'n anweithgar economaidd
- Gweithwyr lleol yn gwella eu sgiliau ac yn gallu cyflawni eu potensial
- Mentrau lleol gyda'r sgiliau cywir i'w galluogi i ddatblygu
- Mwy o gyrsiau i gyflogwyr yn Meirionnydd

6. Amcangyfrif canlyniadau:

- Pobl yn cael help i sicrhau swydd 200
- Pobl wedi mynychu hyfforddiant achrededig 80

Cynllun sefydlu rhwydwaith Gwynedd yn ei gymuned (P3)

POBL

1. Rhagolygon ariannu

Cronfa Twf Lleol	£	495k
Arian o ffynonellau eraill	£	125k

2. Partneriaeth arfaethedig

Cyngor Gwynedd (yn arwain), Canolfan Byd Gwaith, Cyngor ar Bopeth / Cyngor Canolbarth Cymru, cymdeithasau tai lleol

3. Gweithgaredd arfaethedig

- Datblygu model i sefydlu rhwydwaith cynaliadwy o ganolfannau ledled Gwynedd i ddarparu hyfforddiant, cefnogaeth cyflogadwyedd, cyngor busnes a mynediad i wasanaethau
- Pelota'r model yn Tywyn ar safle'r llyfrgell drwy addasu'r adeilad, gwella cysylltedd digidol a darparu gofodau hygyrch
- Datblygu cynlluniau manwl i ymestyn y model i Abermaw a Blaenau Ffestiniog
- Datblygu darpariaeth ledled Gwynedd i helpu bobl lleol i allu cychwyn defnyddio'r we i gael mynediad i wasanaethau, gwella sgiliau a sicrhau gwaith

4. Ardal cyflawni

Bydd buddsoddiad uniongyrchol yn ardaloedd Bro Dysynni a cynlluniau ar gyfer buddsoddiad yn Ardal Dolgellau a Bro Ffestiniog. Bydd elfen o'r prosiect hefyd ar waith ledled Gwynedd

5. Deilliannau tebygol:

- Ail-ddatblygu Llyfrgell Tywyn yn enghraifft o sut ellir addasu gofod presennol i ymestyn ei allu i ddarparu ystod o wasanaethau
- Datblygu model amgen ellir ei gyflwyno ledled Gwynedd .
- Mwy o bobl yn cael mynediad at wasanaethau cyflogadwyedd a chyngor gwaith
- Mwy o bobl yn defnyddio gwasanaethau digidol a gwasanaethau ar-lein
- Mwy o bobl yn derbyn cymorth costau byw a gwasanaethau partner
- Gwell sgiliau a hyder digidol ymhlith defnyddwyr

6. Amcangyfrif canlyniadau:

- Canolfan cymorth newydd wedi ei ddatblygu

Cynllun Talebau Talent Nôl i Wynedd (LI1)

LLE

1. Rhagolygon ariannu

Cronfa Twf Lleol	£	100k
Arian o ffynonellau eraill	£	Dim

2. Partneriaeth arfaethedig

Cyngor Gwynedd (yn arwain), Prifysgol Bangor

3. Gweithgaredd arfaethedig

- Lleoli graddedigion lleol yn mentrau lleol am hyd at 3 mis.

4. Ardal cyflawni

Bydd y prosiect ar waith ledled Gwynedd.

5. Deilliannau tebygol:

- Graddedigion lleol yn cael profiad gwaith mewn menter lleol
- Hyrwyddo cyfleoedd gwaith i raddedigion yng Ngwynedd
- Mentrau lleol yn elwa o dalent bobl ifanc lleol

6. Amcangyfrif canlyniadau:

- Mentrau lleol wedi derbyn cymorth 14
- Pobl ifanc yn cael cyfle i weithio o fewn eu cymuned 14

Cronfa Effeithlonrwydd Ynni Isadeiledd Cymdeithasol (LI2)

LLE

1. Rhagolygon ariannu

Cronfa Twf Lleol	£	350k
Arian o ffynonellau eraill	£	Dim

2. Partneriaeth arfaethedig

Mantell Gwynedd (yn arwain), Adran Economi a Chymuned

3. Gweithgaredd arfaethedig

- Cymorth / grant i fentrau a sefydliadau cymunedol gwirfoddol gyda photensial twf i ddatgarboneiddio ac i fabwysiadu technoleg

4. Ardal cyflawni

Bydd y prosiect ar waith ledled Gwynedd.

5. Deilliannau tebygol:

- Mentrau cymunedol yn mabwysiadu technoleg ac yn datgarboneiddio asedau
- Costau rhedeg asedau cymunedol yn gostwng
- Asedau cymunedol yn parhau yn hyfyw

6. Amcangyfrif canlyniadau:

- Mentrau cymunedol lleol wedi derbyn cymorth 15
- Gwelliannau i gyfleuster cymunedol 15

Cynllun Canol Dinas Bangor (LI3)

LLE

1. Rhagolygon ariannu

Cronfa Twf Lleol	£	497k
Arian o ffynonellau eraill	£	100k

2. Partneriaeth arfaethedig

Cyngor Gwynedd (yn arwain), Byw'n Iach, Bwrdd Iechyd Prifysgol Betsi Cadwaladr

3. Gweithgaredd arfaethedig

- Cam pellach yn natblygiad achos busnes ar gyfer datblygu Canolfan Iechyd Menai wedi ei gwblhau
- Gwarchod asedau i hwyluso defnyddio hamdden, iechyd a lles yn arf ar gyfer adfywio canolfan masnachol dinas Bangor.

4. Ardal cyflawni

Bydd y prosiect yn cael ei gyflawni yn Ardal Bangor

5. Deilliannau tebygol

- Cynnydd yn natblygiad y gweledigaeth ar gyfer defnyddio hamdden, iechyd a lles yn arf ar gyfer adfywio dinas Bangor
- Cynnydd yn natblygiad cynllun Canolfan Iechyd a Lles Menai
- Asedau o fudd i'r gymuned / cymdeithas wedi eu gwarchod

6. Amcangyfrif canlyniadau

- Tir wedi ei ddatgloi ar gyfer ei ddatblygu 0.54 hectar

Cynllun Tir ac Eiddo i Alluogi Twf (LI4)

LLE

1. Rhagolygon ariannu

Cronfa Twf Lleol	£	1.06M
Arian o ffynonellau eraill	£	1.85M

2. Partneriaeth arfaethedig

Cyngor Gwynedd (yn arwain), Llywodraeth Cymru, Mart Dolgellau, Adra, Plas Heli, Antur Nantlle, Ynni Stradau / Cwmni Bro

3. Gweithgaredd arfaethedig

- Cwblhau unedau menter ym Minffordd
- Gwelliannau i wedd a golwg / amgylchedd ystadau diwydiannol i gefnogi'r busnesau wedi eu lleoli yno
- Rhagbaratoi a chynllunio unedau newydd ym Mharc Busnes Tywyn
- Datblygu menter i adfer a gosod eiddo masnachol gwag
- Rhagbaratoi a chynllunio unedau newydd yn Nglyn Rhonwy
- Datblygu safle Mart Dolgellau.
- Gwaith dichonoldeb a chreu dyluniadau technegol ar gyfer cynllun ynni yn Nhanygrisiau
- Datgarboneiddio Canolfan Menter yn Nhalysarn
- Trosi gofod segur yn 4 uned gwaith / targedu buddsoddiad masnachol yn Penrhyn Glandon

4. Ardal cyflawni

Elfennau yn berthnasol i'r sir yn ei gyfanrwydd a datblygiadau penodol yn Ardaloedd Porthmadog / Penrhyndeudraeth, Bro Dysynni, Bro Peris Ardal Dolgellau, Bro Ffestiniog, Bro Llew / Nantlle ac Ardal Pwllheli.

5. Deilliannau tebygol:

- Cynlluniau mewn llaw i sicrhau arian i ddatblygu mwy o unedau gwaith
- Safleoedd gwaith yn fwy cynaliadwy a deniadol i fuddsoddiad
- Lleihau costau ynni fentrau
- Mwy o unedau busnes ar gael i fentrau lleol

6. Amcangyfrif canlyniadau:

- Cyfleusterau wedi eu hadnewyddu 10
- Gofod newydd ar gael i fentrau 1.58 hectar

Cynllun Diwylliant er Twf (LI5)

LLE

1. Rhagolygon ariannu

Cronfa Twf Lleol	£	1.39M
Arian o ffynonellau eraill	£	472k

2. Partneriaeth arfaethedig

Adran Economi a Chymuned (yn arwain), CPD Caernarfon, Rheilffordd Llyn Tegid, Byw'n Iach, Cwmni Tabernacl, Menter y Tŵr, Galeri Cyf., Y Ganolfan, Porthmadog

3. Gweithgaredd arfaethedig

- Datblygiad Yr Oval i sicrhau gemau pêl-droed rhyngwladol
- Ymestyn llwybr Rheilffordd Llyn Tegid ganol Y Bala
- Sefydlu Byw'n Iach Penllyn yn ganolfan rhagoriaeth chwaraeon dŵr
- Uwchraddio Tafarn y Fic, Bethesda, i gynnwys Llety
- Gwella darlithfa a siop Amgueddfa Lloyd George
- Gwella isadeiledd diwylliannol
- Gwella cyfleusterau harbyrau
- Uwchraddio isadeiledd masnachol yn harbwr Aberdyfi, Abermaw a Porthmadog
- Gwella isadeiledd arfordirol pendraw Llŷn
- Datblygu stablau Menter y Tŵr i unedau busnes ac amgueddfa treftadaeth

4. Ardal cyflawni

Datblygiadau yn Ardal Caernarfon, Ardal Y Bala / Penllyn, Dyffryn Ogwen, Ardal Pwllheli, Bro Peris, Bro Dysynni, Ardal Porthmadog / Penrhyndeudraeth, ac Ardal Dolgellau.

5. Deilliannau tebygol:

- Adnoddau diwylliannol, treftadaeth ac hamdden wedi eu datblygu
- Diwydiant pysgota lleol wedi ei gefnogi
- Gofod newydd i fusnesau lleol

6. Amcangyfrif canlyniadau:

- Cyfleusterau wedi eu gwella